



Komunikadu Imprensa

20 Dezembru 2017

JSMP Lansa Relatóriu kona-ba Sentensa no Violénsia Doméstika: Suspensaun ba pena prizaun ho kondisaun sira

Iha 21 Dezembru 2017, JSMP liuhosi Australian Aid – no The Asia Foundation (TAF) nia Projeitu Nabilan, sei lansar relatóriu temátika husi rezultadu peskiza no monitorizasaun JSMP nian iha tribunál distritál sira. Relatóriu ne'e publika ho titulu "Sentensa no Violénsia Doméstika: Suspensaun ba pena prizaun ho kondisaun sira".

Relatóriu ne'e analiza dadus sira bazeia ba rezultadu monitorizasaun no intrevista ho juis, prokurador, nomós defensor públiku, inklui ofisial justisa, Diresaun Protesaun ba Labarik hosi Ministériu Solidariedade Sosial, organizasaun sosiedade sivil ne'ebé fó assistensia legál ba feto no labarik (ALFeLA). Aleinde ne'e, JSMP mós halo intrevista ba iha kondenadu no vitima iha kazu violénsia doméstika ne'ebé hetan suspensaun ba pena prizaun iha kazu violénsia.

Iha JSMP nia estatística monitorizasaun iha tribunál sira hatudu katak Timor-Leste nia tribunál distritál sira aplika suspensaun ba pena prizaun iha kazu kriminal barak ne'ebé kontinua to'o faze determinasaun sentensa, no liuliu iha kazu violénsia doméstika.

Tendénsia ne'e bele ilustra liuhosi sentensa sira iha tinan 2016, ne'ebé hatudu katak suspensaun ba pena prizaun aplika ona iha 50% husi kazu kriminal hotu-hotu ne'ebé JSMP monitoriza no partikularmente iha kazu violénsia doméstika sira, proporsaan ne'e aas liutan – tanba besik 80% simu suspensaun ba pena prizaun iha 2016 nia-laran.

Depoizde suspende tiha ezekusaun pena prizaun ne'e, normalmente laiha mekanizmu atu kontrola no garantia katak kondenadu sira kumpre sira nia sentensa ne'e.

"Relatóriu ne'e diskuti preokupasaun sira kona-ba suspensaun ba pena prizaun sein mekanizmu ka instituisaan própriu atu monitoriza efetividade husi sentensa hodi halo prevensaun no enkoraza tribunál sira atu uza artigu oioin husi Kódigu Penál ne'ebé fó fatin atu aplika rekizitu adisionál ba suspensaun ba pena prizaun, "dehan Diretor Ezekutivu JSMP, Luis Oliveira Sampaio.

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77295795

www.jsmp.tl

info@jsmp.minihub.org

Facebook: www.facebook.com/timorleste.jsmp

Twitter: @JSMPtl

Aplikasaun regra ba konduta no kondisaun adisionál ba kondenadu atu obriga kondenadu kumpre suspensaun ba pena prizaun ho apresenta an ba tribunál ka entidade seluk. Ida-ne'e bele realiza objetivu importante husi sentensa kona-ba protesasaun, kastigu, prevensaun no rehabilitasaun. Mekanizmu bele kontribui hodi hamenus violénsia doméstika iha comunidade, inklui monitoriza ema ne'e hodi garante katak nia la halo krime seluk no fó-hanoin ba ema ne'e kona-ba konsekuénsia husi nia asaun iha tempu pasadu ho nune'e nia la repete tan.

Aleinde ne'e, JSMP mós husu atu tribunál sira tenke konsidera mós orden seluk ne'ebé bele foka ba efeitu husi krime ba vítima, hanesan husu deskulpa iha públiku ka obriga kondenadu selu indemnizasaun sivil ba vítima. Tribunál sira mós tenke iha possibilidade atu haruka kondenadu simu tratamentu médiku ka rehabilitasaun, ne'ebé sei monitoriza husi servisu reintegrasaun sosiál, ka haruka nia halo servisu komunitáriu, hanesan hatuur ona iha Kódigu Penál.

Relatóriu ne'e konklui ho rekomendasaun ba asuntu sira ne'ebé diskuti iha leten no bele asesu iha website JSMP iha www.jsmp.tl depoisdé ofisiálmente lansa ona ba públiku.

Atu hetan informasaun klean, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.tl

info@jsmp.tl